

Brindis di canto tabata "Champana Musical"

Misa Fatima na Dakota tabata practicamente yena por completo di aranzon anochi cu un publico culto cu a bin goza di e "Brindis di Canto", concierto cu a ser presenta pa **School di Musica Rufo Wever**, cu coro y cantantenan dirigi pa **Tica Giel**.

Un concierto cu cancionnan clasico, semi clasico y moderno (clasico) cu cantantenan cu talento excepcional riba nos isla.

Un concierto cu e publico a goza di cada minuut di dje y a aplaudi e cantantenan cu entusiasmo.

E nivel tabata halto, tanto di e musica como di e cantantenan, cu voznan di **soprano, mezzo soprano, tenor y bariton** sonando cu tur claridad. No por a scucha ningun tono cu por a baha of subi di mas, of cu tabata tin un toque di falsedad of cu tabata un tono forza.

E cantantenan a demostra con por canta cu articulacion perfecto, dominio di voz perfecto y cu un claridad perfecto, algo cu hopi di nos cantantenan por sifa di dje.

Chucho Hoek riba su guitarra, **Marijke Verbraeken** riba conga y **Rob Rijnbout** riba Piano, a acompaña e cantantenan y na final **Floor Huygen** conoci pa su reñanan cultural den **Amigoe**, a demostra su experticio riba **dwarsfluit**, conquistando tur e presentenan cu su toca sublime acompañando tur e cantantenan hunto den coro, interpretando e Canon tradicional Aleman "**Music Alone Shall Live**".

A ser hasta pidi pa ripiti e cancion aki y pone un microfono pa por a scucha e fluit mihor apeser cu den e prome presentacion e tabata cla y bunita. Tur cantante hunto a habri e anochi cu e canon "**The Singing School**" sigui

pa e cancion folklorico ingles, "**Early One Morning**". **Ferdinand Franca** seguidamente a demostra e voz bunita tenor cu e tin cantando cu un dominio di voz sublime, e composicion di **Ed Mc Curdy**, "**Last night I had the strangest dream**". E tabata un cantante cu bo lo kier a scucha un vez mas.



ARLENNE

E soprano **Flora de Bie**, y e bariton **Joaquin Kelkboom**, den duo a presenta di **Purcell** cu areglo di **Moffat**, "**let us wander**".

Masha bunita e voz soprano di **Flora** a sali den e cancion aki, mientras cu e bariton di **Joaquin** a resona fuerte den combinacion despues cu e coro, trio y cuarteto di cantantenan.

E mezzo soprano **Maria Maduro** cu su cancion na frances, "**Venez, agreable printemps**" tambe tabata tin un presentacion masha admirable cu un voz precioso pa e cancion di siglo 18 di **Ber-**

gerettes.

Di mes un areglista **J.B. Weckerlin**, **Lidia Croes**, seguidamente a presenta e cancion frances, **Chantons les amours de Jean**. **Lidia** tambe por ta masha contento cu su presentacion, cu a ser hopi aplaudi.

E coro consistiendo di **Arlenne Croes**, **Lidia Croes**, **Jane Lanooij**, **Maria Maduro**, **Lidwina Pieters**, **Chris Lanooij**, **Don Quandt** y **Joaquin Kelkboom** despues a duna e publico e prome sabor di un "a capella" cu tabata e popular "**Alouette**", cancion folklorico frances.

Y e coro femenino perfectamente dirigi pa **Tica Giel** a presenta despues cu acompañamento di guitarra, "**Somewhere there's a forest**".

Aki mester menciona cu ta un placer pa scucha e claridad di voznan di e coro y e cancion cu nan a interpreta despues, **Skye Boat Song**, un cancion folklorico escoses tabata canta cu mes preciosidad pero pa e coro femenino so consistiendo di tur e cantantenan femenino menciona hunto cu **Victoria Andrews** mezzo soprano, **Astrid Arends** mezzo soprano, **Sixta Henriques** mezzo soprano, **Dorothy Lacle** soprano, **Lila Richardson** alt, **Jane Lanooij** alt, **Gisela Trimon** y **Carmen Tjueehut** como mezzo soprano.

Despues di a canta e cancion gales "**All Through the night**", nan a cera nan presentacion di e prome parti cu e bunita cancion folklorico italiano **La Villanella**.

Max Koolman, cu riba piano **Fred Dirksz**, a canta e composicion di **R. Leoncavallo**, **Matinata**.

Por a ripara e progreso enorme di **Max** for di tempo cu e tabata fumando les cerca **Rhoda Frigerio**, te cu

awe cu e ta cu **Tica Giel**. **Max** a presenta cu cancion cu bon dominio di su voz di oro y a cosecha masha aplauso di e publico cu a goza un mundo di poderio di voz.

Masha precioso tambe tabata interpretacion di "**Himno di Mascaruba**" di **Padu Lampe** y **Domi Tromp** aregla pa **Tica Giel** den **A Capella**. El a ser canta pa **Tica**, **Jane**, **Chris** y **Joaquin** den cuatro voz.

Domi Tromp y miembronan di **Mascaruba** presenta a keda encanta cu e presentacion aki.

Arlenne, **Jane** y **Joaquin** den tres voz a duna seguidamente un bunita presentacion di **Serenada** di **I. Provence** y cu mes areglo di **R.L. Williams** nan a interpreta "**Maria ta den cushina**".



CHRIS

E cantante femenino cu a conquista e publico cu su voz soprano y bunita dominio y articulacion, tabata **Arlenne Croes** cu a canta e wals di **Toti Arends** y **Hubert Booi**, "**Speranza**".

Su dominio di voz tabata asina natural cu no ta nota ningun momento cu e ta hala rosea pa por sigui y mantenimiento e tononan tur cla cu por tin.

Arlenne tambe tabata un di e cantantenan cu sigur tur hende lo a kier a scucha un biah mas e anochi aki.

Otro cantante cu a sorprende cu un voz tenor masha bunita y bon domina tabata **Chris Lanooij** cu a canta **Let it be** me di **Becaud** y **Curtis**, sigui pa un bunita presentacion di **Victoria Andrews** di e cancion di e musical **Jesus Christ Superstar**, **I don't know how to love Him**".

Dos cancion cu sigur a cay masha dushi e anochi aki tabata di **Rogers y Hammerstein**, **Climb Every Mountain** di e pelicula musical "**Sound of Music**" preciosamente canta pa **Jane**



FRED

Lanooij y e coro femenino interpretando "**Edelweiss**". E cantante cu a "steal the show" tabata **Fred Dirksz** cu tambe e publico lo kier a scucha un biah mas sigur.

Fred mahistralmente a interpreta e cancion italiano di **Donaggio** y **Pallavicini**, "**Lo che non vivo senza te**" cu na ingles ta conoci como "**you don't have to say you love me**".

Masha aplauso e tenor aki a ricibi di e audiencia pa tanto su voz, dominio di esaki, y su presentacion.

Prome cu e coro completo a cera e anochi, a presenta ainda e cuarteto di **Tica Jane**, **Chris** y **Joaquin**, kendenan cu acompañamento di **Chucho Hoek** riba guitarra a canta di e musical "**The Fantasticks**" e composicion **Try to remember** sigui pa e composicion di **Cees Nieuwenhuizen** **Absence**.

E concierto a wordo cera cu e canon tradicional aleman di cual nos a skirbi ariba, "**Music Alone Shall Live**".

Esaki tabata un concierto cu tabata tin ausencia grandi di nos musiconan, nos cantantenan, nos trahadornan den cultura, nos autoridadnan riba tereno di cultura, locual a wordo hopi comenta pafo tambe.

Un concierto cu ta bal la pena presenta den tur parroquia pa asina mas y mas hende por disfruta di e "tipo di concierto aki" y haya mas aprecio pa kico ta "nivel halto musical y di canto". Un pabien grandi sigur ta bay na **Chucho Hoek**, **Tica Giel** y tur esnan cu a participa den e anochi masha agradable aki.

Juby



CORO FEMENINO

TELEFONNAN DI DIARIO
826747- FAX 828551